



الحمد لله و أشهد أن لا إله إلا الله وحده لا
شريك له وأشهد أن محمدًا عبده ورسوله
صلى الله عليه وسلم

أما بعد أهلاً ومرحباً بكم في لقاء جديد لايف
جديد من لقاءات لايفات يوم الإثنين نسال الله
سبحانه وتعالى يتقبل منا ومنكم صالح
الأعمال

يمكن آخر لايفين كانوا اتكلمنا فيهم بشدة
شوية على موضوعين الموضوع الأول هو

علو الهمة كان تحت عنوان  لا أبرح
حتى أبلغ واتكلمنا جامد شوية واتكينا على
نفسنا

شوية وأنا قولت لكم إحنا محتاجين خطاب
عالي شوية يكون فيه فعلاً ننكشف قدام نفسنا
وما نقعدش نطبطب كثير الطبطة لها وقتها
والشدة لها وقتها والخطاب اللي هو لين له
ناسه والخطاب برضو اللي ايه؟ فيه نوع من
من المصارحة له ناسه

أعتقد ان في جمهور كبير منكم محتاج
الخطاب اللي فيه نوع من الجدية والمصارحة
وإن إحنا بقى كفاية يعني يعني إحنا ممكن
بنطبطب على ناس وفعلاً ده الخطاب المناسب
ليهم لكن في ناس بتتظلم بقى في خطاب
الطبطة ده ومحتاجين إن إحنا نتكى على نفسنا

شوية عشان نطلع بجيل ناشف شوية جيل قوي
شوية

تخيلوا الصحابة رضي الله عنهم و أرضاهم
أول ما نزل من القرآن سورة الإيه مزمل
والمدثر والكلام ده كان بيتقال لهم { قُمْ الْيَلَّ إِلَّا
قَلِيلًا } [سورة المزمل : 2]

يعني أنتم متخيلين أول طلعة عاملة إزاي؟ ده
{ قُمْ الْيَلَّ إِلَّا قَلِيلًا } يعني يعني إيه ده كده؟ يلا
بيننا يلا بينا نبداً دي في سورة مكية وفي أوائل
السور اللي نزلت يعني كناس مكنش نزل بقى
أول ما نزل إيه تصلي ركعتين كده والله ربنا
يسهل ده كويس إن أنت مغطية نصف شعرك
مفيش الجو ده الجو كان إيه؟ كان { قُمْ الْيَلَّ إِلَّا
قَلِيلًا }

فالجيل داخل على طول إيه؟ يعني يعني علي
السخن على طول تمام؟ وطبعًا شافوا بقى
التعذيب وشافوا الإساءة وشافوا وشافوا
بس في الآخر ده الأساس بقى اللي كل بنيان
الاسلام اتبنى عليه فلو ما كانش الجيل ده
اتعرض للضغوط ديه مكناش هنشوف أي
حاجة من اللي إحنا شايفينها دلوقتي ف إحنا
نفسنا بعد فضل الله سبحانه وتعالى إحنا واقفين
في عمارة كبيرة أوي أساسها هما دول فلو
كان الأساس طري فتوقع اللي بعده طري

فلو أنا بكلم دلوقتي جيل أقصى أحلامي منه إن
هو يدوبك يا رب نصلي ركعتين وعائزين
بس يعني إيه نقرب من ربنا شوية كده يا
جماعة شوية وشوية والجو ده طيب ماشي
طب اللي بعدك واللي بعد اللي بعدك؟

طب واللي متوقع إيه من الأجيال اللي جاية؟
إذا كان الأساس إحنا دلوقتي بنرجع إلى الله
وبنقول يلا بينا جيل جيل كده يحمل هم
الإسلام هيبقى طري بالشكل ده فمحتاجين
برضوا خطاب يعني للناس الصفوة أكيد مش
كلنا هنبقى كده بس أنا بقول يمكن خطابي ده
يقابل الصفوة اللي إحنا منتظرين منهم إن هما
يشيلوا هم الدين ، يشيلوا هم الدعوة ، يحملوا
هم الإسلام ، وفعلاً نقدر نبني عليهم دعوة
كبيرة ويغيروا الواقع الأليم اللي إحنا فيه

﴿ **مين هينقذ الشباب؟** مين هيغير الواقع إذا

كان اقصى أحلامك إنك تغير نفسك تمام؟

■ **من سيغير الواقع؟** إذا كان الشخص أقصى

أحلامه إنني يا رب أغير نفسي ، إذا كان كل

يوم بيقوم ويقع عدة مرات هيغير واقع إيه ده؟

■ فالأول محتاجين بقى إيه؟ جيل كده عنيف

لا جامد جيل بقى اللي ربنا قال

{ إِنَّ رَبَّكَ يَعْلَمُ أَنَّكَ تَقُومُ أَدْنَىٰ مِنْ ثُلُثَيِ اللَّيْلِ

وَنِصْفَهُ } [سورة المزمل : 20]

ياريت كده بس {طَائِفَةٌ مِّنَ الَّذِينَ مَعَكَ} يعني

كل اللي معاك كده {طَائِفَةٌ مِّنَ الَّذِينَ مَعَكَ}

يعني كان العادي بتاع الصحابي في أول

الإسلام كان يصلي ثلث الليل ونصف الليل

والكلام ده ف إحنا بنهزر صبح؟ إحنا بنهزر

فعلاً إحنا بنهزر،،

ف لا إحنا بقى نشد على نفسنا شوية علشان

مش علشان خاطرنا إحنا علشان ولادنا علشان

ولاد ولادنا علشان يبقى فينا طاقة زيادة نبثها

في اللي حوالينا مبيقاش أقصى أحلامنا وأبقى

اناني وأقصى أحلامي في إلزامي إن أنا بس
إيه أبقى كويس لا أنت محتاج مزيد من النور
عشان تمشي به في الناس لا محتاج نور زيادة
عشان توزعه محتاج نور زيادة عشان تأثر
في اللي حواليك {نُورًا يَمْشِي بِهِ فِي النَّاسِ
[سورة الأنعام : 122]

تمام؟ كما قال الله سبحانه وتعالى { أَفَمَنْ زُيِّنَ
لَهُ سُوءُ عَمَلِهِ فَرَآهُ حَسَنًا } [سورة فاطر :
[8

و قال { نُورًا يَمْشِي بِهِ فِي النَّاسِ كَمَنْ مَثَلُهُ
فِي الظُّلُمَاتِ لَيْسَ بِخَارِجٍ مِنْهَا } [سورة
الأنعام : 122]

ففي فرق أكيد من ده وده وكل ما زاد الإنسان
نوره كل ما كان نافع لغيره {وَمَنْ لَّمْ يَجْعَلِ اللَّهُ

لَهُ نُورًا فَمَالَهُ مِنْ نُورٍ { [سورة النور :

[40

يمكن اتكلمنا في المرات اللي فاتت على
موضوعين الموضوع الأول سميناه لا أبرح
حتى أبلغ والموضوع الثاني اتكلمنا في عصر
التفاهة عصر التفاهة واتكلمنا إزاي بيحصل
تجريف بسبب الميديا أو بسبب كمية التفاهة
اللي إحنا بنتابعها في الميديا بيحصل تجريف
لأفكارنا تجريف لاهتماماتنا تجريف لأهدافنا
حتى صرنا إحنا مجرد ترس في أهداف
الآخرين مجرد سلعة مجرد بضاعة مجرد
زباين على موائد الآخرين مبقاش ليك هدف
ذاتي بقيت إنسان آسف تافه مجرد بتابع
مجموعة من

التافهين اللي ماله مش قيمة وماله مش هدف
وصرت أنت على هيئتك المفروض الإسلامية
أو صورتك الملتزمة صرت شبه الناس ما
بقيتيش إلا عبارة عن مجرد شيء شخص
واحد من ملايين ملايين بيتابعوا فلان وفلانة
وفلانة ودي بس إنجازاتك اليومية إن أنت
بتابعي فلانة وفلانة وفلانة وبتشيري
وبتضحكي وتبعتي لأصحابك عشان نهزر
ونهزر على الهزار ونعلق على التعليق ونبص
على البوست لغاية ما اليوم كله بيضيع في اللا
شيء لو قعدت آخر اليوم أقول أنا عملت إيه
لنفسي ولغيري

لولادي ولزوجي ولأمي ولأبويا والمجتمع من
حواليا اللاشيء

إحنا تحولنا إلى اللاشيء في اللاشيء لكن
شكلنا بس من برة حلو لكن ربنا عليم بالسر

فعايز أقول إن من الحاجات اللي ممكن تديني
انطباع عن المستوى اللي أنا وصلت له هل أنا
كويس؟ ولا مش كويس؟ تمام دعنا من الهيئات
ما أنا ممكن علاء حامد ملتحي هل أنا كويس؟
وارد وممكن يكون دي الحسنة الوحيدة اللي أنا
عاملها هذه اللحية تمام؟ والباقي سيئات ممكن
يكون اللي بخمار و نقاب تكون برضوا
كويسة وممكن تكون دي الحاجة الوحيدة
الكويسة اللي عملاها فما نضحكش على نفسنا
اللحية دي معناها إن علاء كويس تمام؟ النقاب
مش معناه إن أنت كويسة هو اه علامة بتقول
إن شاء الله غالب الظن إن هي كويسة بس
مش علامة مؤكدة فقد يكون يعني ربنا سترنا

بالظاهر لكن القلوب فاضية والنفوس خاوية
والهم للأسف وضیعة

فاللي عايز إن إحنا ما نتغرش بشيء من
الظاهر الجميل واللي هو أصلاً من الدين ولا
شك إنه مطلوب لكن لابد إن ننقب في الباطن
كل شوية كل شوية ننقب في الباطن وننظر في
أنفسنا هل إحنا فعلاً كما نبدو؟ أم أن العلانية
أفضل بكثير من السر وهي دي مشكلة كبيرة

لأن السلف كانوا يتواصلون بثلاث كلمات من
أصلح ما بينه وبين الله أصلح الله ما بينه وما
بين الناس ، ومن أصلح سره أصلح الله له
علانيته ، ومن أصلح دينه أصلح الله دنياه

فأنا عايز اقول إن الظاهر ده لو فعلاً ما
تزامنش معاه إصلاح للباطن يوشك إن ربنا

يفضحنا ويفضح إن الظاهر ده مجرد ظاهر
لكن مفيش حقائق هو

طيب أنا عايز أوصل لإيه؟ عايز أوصل
النهاردة اتكلم في معيار واحد معيار واحد فقط
من المعايير اللي بتديني انطباع عن أنا إيه
المستوى اللي وصلت له بعد زمن من
التزامي مثلاً بعد زمن من استقامتي، بعد زمن
في نفس الوقت بعد زمن من إن أنا في نفس
الوقت بتابع ميديا كتير بفولو على صفحات
كتير قاعد منهمج بالساعات الساعات الطويلة
على تفاهات في الآخر بطلع باللاشي

■ يا ترى أنا فين دلوقتي؟ لإن أنت دلوقتي
أغلب الناس أنا متأكد إن اللي يتابعوني دلوقتي
هو الصنف اللي أنا هكلمكم عليه وقولوا لي
أنتم كده ولا لا؟ عشان أكمل ولا لا؟

إحنا صنف كما قال سبحانه وتعالى { **خَلَطُوا**
عَمَلًا صَالِحًا وَءَاخِرَ سَيِّئًا } [سورة التوبة :

[102

يعني أنا الصنف إن اللي بيتابعني دلوقتي مش
شخص سيء للغاية ولا صالح للغاية وإنما قوم
{خَلَطُوا عَمَلًا صَالِحًا وَءَاخِرَ سَيِّئًا}

يعني بتصلي، ممكن محجبة، ممكن بنقاب،
ممكن بتقولي أذكرك ، ممكن بتقري قرآن في
نفس الوقت تسمعي أغاني ، بتسمعي تتفرجي
على مسلسلات بتسمعي أغاني كوري بتشوفي
تفاهات كتيرة أوي أوي أوي أوي طول
اليوم كمية ريلز مهولة كمية posts مهولة
كمية shorts مهولة كمية تفاهات غير
عادية

أحياناً بنشوف رقص أحياناً بنشوف اغاني
أحياناً بنشوف موسيقى أحياناً بنسمع كله على
كله إحنا إحنا كده ده أنا مش قدامي لا قدامي
أنا آسف المنحرف أوي ولا أنا قدامي
المستقيم أوي إحنا كده إحنا قاعدين إحنا ميكس
دلوقتي طيب أنا دلوقتي طالما أنا ميكس فأننا
دلوقتي إيه اللي غالب عليا؟ ما هو أنا ده
الخطر بقى ما كلنا مخطئين ما هو ما فيش حد
مسلم إلا مخط بس الخلطة قد إيه؟ الخلطة قد
إيه؟ نسبة قد إيه؟ ممكن الواحد يكون تسعين
في المية صالح وعشرة في المية يعني بتقلت
منه وفي واحد ثمانين وعشرين في واحد
سبعين ثلاثين في واحد لا

في واحد الخير وصل خمسين وفي واحد
لاقي الخير أربعين أو ثلاثين والشر ستين أو

سبعين طب أنا أعرف دلوقتي أنا في التخليطة
ديه مستوايا إيه؟ أنا وصلت لانهي حد من
التخليط تمام؟ وإيه اللي بيغلب علي الآن؟ ما
هو ممكن زي ما قولت لكم دي في كل لحيتي
دي من بقايا العشرة في المية اللي فاضلة

يعني يعني ده اللي فاضل تمام؟ ممكن أنا
خلطت لدرجة إن إن الظاهر اللي قدامكم ده
لحيتي أو أو نقابك أو خمارك أو كده ده من
البواقي اللي فاضلة مش معنى كده إن أنا
كويس

ده أنا التخليط بدأ يزود قوي لدرجة إن العمل
السيئ بدأ يوصل لخمسين وستين وسبعين
ويمكن اللي أنت شايفه قدامي ده الصلاة اللي
بصليها والحجاب بتاعي والحيية بتاعتي و
شوية الأذكار اللي أنا بقولهم دي من العشرة

عشرين في المية اللي فاضلة بس أنت ما
تعرفش إن تمانين أو سبعين في المية بدأوا
يتأخذوا مني

طيب أنا أنا أعرف منين؟ يعني إيه العلامات
اللي تقول أنا الخلطة عاملة إزاي دلوقتي؟ ما
أنا ممكن دلوقتي أحطلك مشروبين على بعض
فأنت تشرب تقول لي لا ده ليمون لا دي
جوافة تمام؟

حسب أنا حظيت ليمون كثير ولا جوافة كثير؟
فهو قعد يشرب يقول لك لا دي جوافة ما
تحسش بالليمون خالص أنا حاطط نقطتين فجأة
ده ليمون بس فيه كده ريحة جوافة كده فأنا إيه
دلوقتي؟ أنت ليمون مر ولا جوافة حلوة؟ تمام
طيب

النهاردة إيه إيه الحاجة اللي هنعرف بها
المقياس اللي هنتكلم عليه هو المقياس اللي
عملت له العنوان ده، ما الهم الذي تحمله؟ بس
الموضوع بسيط جدًا ما الهم الذي تحمله يعني
يعني ايه الهم يا جماعة؟ إيه هو الهم؟

الهم هو شيء بيغلي في نفسك تاني الهم هو
شيء بيغلي في نفسك كده حاجة دايمًا تتردد
في نفسك وأنت لا تملك لا تملك إن أنت تدفعها
لأن هي مسيطرة عليك مسيطرة عليك
شاغلاك فعلاً شاغلاك فعلاً وأنت صبح وليل
بتفكر فيها وفعلاً واخدة وقتك واخدة تفكيرك
وبتلاقي نفسك لا إرادياً تسرح فيها لا إرادياً
بتحسب لها حسابات لا إرادياً بتلاقي نفسك
بتأخذ لها وقت، فلوس وبتحاول تطور نفسك
علشانها بتتسحب لها دايمًا لأن زي ما بيقولوا

هو ده الهم ده اللي هو اللي بنسميه دلوقتي
الشغف

إيه اللي شاغلك طب أنا أعرف منين برضو
اللي شاغلني؟ دايماً اللي شاغلك ده هو الشئ
العفوي يعني إيه العفوي؟ يعني الحاجة اللي
هي بتظهر دايماً في نفسك و بتخبط عليك
وبتشغل بالك وبتطرقك طرق من غير استئذان
ومن غير تحضير

يعني وأنت قاعد كده سرحان بتلاقي نفسك
دماغك راحت فين؟ ده همك وأنت سرحان
بدون تحضير بدون تكلف بدون تزييف ولا
تزيين أنا قاعد كده سرحان لوحدي راحت
دماغي فين؟ إيه اللي ده غالباً طبعاً مش مش
على طول على طول هسرح في نفس الحاجة
بس غالباً دماغي بتروح فين؟ لما باجي أنام

على السرير كده وأنا مثلاً ما بنمش بسرعة
بقعد ربع ساعة كده علي السرير لغاية ما أنام
الربع ساعة دية دماغي بتسرح في إيه؟

لإن غالباً الأوقات ديه مش بيبقى فيها تكلف
ببيقى الإيه اللي في قلبك هو اللي بيجري
وخلص فاهمين الفكرة؟ فتلاقي دماغي راحت
فين؟ إيه اللي بنام عليه؟

تمام؟ هو دا ياترى برضوا نفس الفكرة أول
ما بصحى أول ما بصحى كده من النوم
وعيني تفتح وابتدي أعمل إجراءاتي الروتينية
العادية بلاقي نفسي دماغي بردو سرحت في
إيه؟ إيه أول حاجة بفكر فيها بظمن عليها
عايز اتأكد عايز أتابع عايز أرتب يومي على
أساسها عايز أعمل لها خطة النهاردة لإن هي
موضوع مهم بالنسبة لي تمام

إيه هي الحاجة اللي بتلاقي نفسك عايز
تصرف فيها فلوسك، عايز تستهلك فيها وقتك
ده إسمه الهم، ده إسمه إيه؟ الهم

اللي بيحصل بدون كلفة بدون اصطناع بدون
تزييف ولا تحضير هل فعلاً إيه هو همك بقى
حاجة صعبة جداً في ناس هموم بقى الناس إيه
ربنا قال إيه يا جماعة؟

قال { إِنَّ سَعْيَكُمْ لَشَتَّى } [سورة الليل : 4]
{ إِنَّ سَعْيَكُمْ لَشَتَّى } تمام

والنبي عليه الصلاة والسلام يقول إيه بيقول
"**كل الناس يغدوا**" يعني كل الناس بتصحى
الصباح و بتفطر وبتنزل شغلها بس هنا في
فروقات كثير "**كل الناس ياخدوا فبائع نفسه**
فمعتقها أو موبقها فبائع نفسه فمعتقها أو
موبقها"

فكل واحد هو وهمه بقى والنبي عليه الصلاة
والسلام قال إيه يا جماعة قال **"من أصبح
والدنيا همه"**

فهي دا انطباع أنا أول ما بصحى بفكر في
إيه؟

بفكر بس في أكلي وشربي ولبسي وشياكتي
وجمالي وهصاحب مين؟ وهعاكس مين؟ ومين
النهاردة يعاكسني؟ وهاقابل الواد الفلاني ولا
أقابل البت الفلانية؟ يا ترى إحنا هنتعشى
ونتغدى فين ونأكل إيه؟ يا ترى إحنا انهاردة
هنروح فيلم إيه؟ ونسهر فين؟

وهقعده على أنهى قهوة؟ ده اللي بيجري في
الدماغ. تمام .

ولا أنا بصحى مثلاً الصبح ،أول ما بصحى
اه يا ترى النهاردة هظبط صلاتي إزاي؟ ده
موضوع شاغلني أوي هظبط صلاتي إزاي؟
انهاردة يومي أمشى إزاي؟ هروح الجامعة
وبعد هروح عند صاحبتى ،صاحبتك مثلاً
وبعد كده والله هروح بالليل أروح أزور
والدتي، عايز اظبط يومي عشان الصلاة ما
تجليش مني.

أصلي الظهر في المسجد الكلية ،هصلي
العصر بعد ما أنزل من المواصله عند
صاحبتى، وهصلي يعني إيه؟

أنا ده اللي ساعدني وبعد كده بالليل قبل ما أنام
شاغلني أوي إن أنا أكوي عايزة أكوي الخمار
كويس عايزة أكوي النقاب بتاعي عشان
الصبح ما اتكعبلش وما استسهلش وأروح

لابسة اللبس اللي هو اللي بستسهله ده دايمًا
وبنزل به وهو مش منضبط ومش شرعي
،وأجي الصبح أقول خلاص هلبس الواسع
وهلبس اللبس الكويس اللي أنا جبتّه، لسه
هكوي وما كويتوش لأ مش عايزة أعمل كده
فمن بليل أنا دماغي كلها في ايه؟

في أكوي وظبطي اللبس كلا أتأكدي إن
حجابك مضبوط التمام ده اللي تاعبني

تخيل واحدة بتفكر في كده تمام، حتى اللي
بتفكر زي ما بتقول أستاذة وفاء بتفكر في
ولادها وهيأكلوا ايه وهيشربوا ايه وهيلبسوا
ايه؟ ما دي حاجة تفكير على فكرة إيجابي
كويس؛ لأن ده شيء من العمل الصالح، تربية
الأولاد من العمل الصالح، إهتمامك بزواجك،
إهتمامك بأولادك، إهتمامك ببيتك ده من العمل

الصالح على فكرة، إحنا بس مش تفكيرنا
الصح هو عبارة عن الصلاة والصوم بس، بل
كوني مهموم بولادي من عال جاريتين وأحسن
إليهم حتى لغاية ما يتجوزوا له الجنة، ثلاثة أو
إثنين ما هي دي برضو من هموم الإيجابية.
حسن التبعل للزوج، طاعة الزوج، التزين
للزوج دي من الهموم الإيجابية فأنا عايز أقول
إن كل ده كويس ياريت تبقى هموم النساء في
أولادهما ومع زوجها وبيتها، لكن انا بتكلم في
هموم تحت، تمام ناس بتكلم هتروح الجامعة
تقف مع مين؟ تمام هتروح الجامعة الشباب
بترد على تمام، بتكلم قاعدة ساعة قدام المراية
همها شكلها عشان الكلام والمعاكسات والثناء
اللي هتسمعه، في واحدة العكس زي ما قلنا،
تمام؟ في واحد كل همه قبل ما ينام هيصلي

الفجر إزاي؟ ده موضوع الساعة بالنسبة له،
ده موضوع الساعة بالنسبة له ، بيضبط ثلاث
منبهات، انا اعرف واحد كان يضبط ثلاث من
أربع منبهات، ويضبط الموبايل ويضبط منبهه
ويحط منبهه بعيد تمام؟ وكان ينام على الارض
يقول لي ما نامش على السرير، ينام على
الارض والله، يقول لي عشان أصحى الفجر،
ويوصي ناس تصحيه ويوصي الأخوة
تصحيه، موضوع بالنسبة له معركة كل ليلة،
وفي واحد كل همه ولا أي حاجة، يعني ايه؟
بيقعد على السرير يتفرج على شوية حاجات،
ويمكن يعك الدنيا قبل ما ينام أقصى أحلامه
أصحى الشغل وخلاص، فده هم وده هم، فاللي
عايز أقوله إن إحنا وفي بقى للأسف بقى ايه،
في مرحلة بقى غريبة، مرحلة اللا شيء

اللاههم لا شيء ودي مرحلة عجيبة، الشخص
اللي هو ايه ؟ كما قال تعالى: ﴿ وَلَا تُطِيعْ مَنْ
أَغْفَلْنَا قَلْبَهُ عَنِ ذِكْرِنَا وَاتَّبَعَ هَوَاهُ وَكَانَ أَمْرُهُ
فُرُطًا ۖ ﴾ [الكهف: ٢٨]

الشخص اللاشيء دوت اللي هو ما بيفكرش
في اي حاجة أصلاً، يومه زي صباحه نام
صحي كل ما كلش المهم وهو قاعد طول ما
هو قاعد معاه موبايله هو ما عندوش أي هم
خالص، لا إيجابى ولا أي حاجة خالص، يعني
هو اللا شيء، تمام، فاللي عايز أقوله يعني
ايه؟ إن في شباب وصل للمرحلة دي وده
هنتكلم عنه كمان شوية، يعني هو لا عنده أي
هم لا دنيا ولا دين ولا أي حاجة، هو اللا
شيء، واللا شيء دي يعني زي ما هنشوف أو
خلينا تتعجل إن دي من آثار الميديا، اللا شيء

بس خد بالك اللا شيء إلا موبايلاه، يعني لو
خدتي منه موبايلاه هنكتشف إن هو مش اللا
شيء، هو صار همه موبايلاه، تاني في شاب
كده تحس إن هو قاعد إن هو اللا شيء يفكر
لا شمال ولا يمين ولا أي حاجة، لا عايز بنات
ولا عايز سجاير ولا عايز صلاة ولا عايز
قرآن ولا عايز أي حاجة، فاحنا بنفتكر إن هو
لا شيء لا هو مش اللا شيء، هو هتعرفي
أمتى؟ خدي موبايلاه، هتعرفي هو صار شغفه
الوحيد وهمه الوحيد وشغله الشاغل إن يبقى
في إيده موبايلاه بس، إدي له موبايلاه وسيبيه،
ممکن يقعد بالأيام والليالي مش عايز أي حاجة
من أي حد، لا صاحب ولا شمال ولا يمين ولا
أي حاجة، رغم إن الموبايل فيه الشمال بس
هو زي ما أقولك إحنا هو خلاص هو بقى هنا

خلاص، تمام وصار عندنا للأسف جيل زي
ما اتكلمنا يمكن في لقاء قبل كده من آفات
السوشيال ميديا هو التمحور حول الذات
التمحور حول الذات إن أنت صار ما عندك
هم للآخرين، لا إيجابي ولا سلبي ولا أي
حاجة، صار أنت لا تهتم إلا بنفسك فقط وهنا
بيتكون بقى أمراض زي النرجسية وزي الإيه
السادية والحاجات الغريبة اللي بنسمع عنها
ديت دي من آثار الميديا إن صار الانسان
شغله الشاغل هو نفسه فبتطلع بقى واحدة
تقولك أنا زوجي سادي مثلاً أو نرجسي، تمام؟
أو زوجتي حاسس إن هي في عندها نرجسية
عندها يعني ايه؟ الحاجات الشاذة اللي بنسمع
عنها سواء في المعاملة أو في العلاقة أو كده،
دي من نتايج الميديا صار شخص لا يبالي

بالآخر لا يبالي بالآخر فعلاً، وعلى فكرة في مشاكل زوجية كبيرة جداً ناتجة عن هذا الشيء إن إحنا بنكتشف إن في ناس صار فقد قدرة على الحب نفسه، أنتم فاهمينها دي يا جماعة؟ صار غير قادر أن يحب بقى بيتعامل مع الآخر ده على إنه حد بيحبني، هو ما بيحبش، هو عايز يتحب بس هو مش هيقول كلام حلو، هو عايز يتقال له كلام حلو، هو مش متعود إن هو يقول، هو أنتم بتابعوني كلكم بتابعوني، تعملولي لايكات، تقولولي كومنتات، تتفاعلوا معي، تقولولي أنا حلو، تشكروا في صورتي بس، هو صار شخص بتفتكر إن هو حلو، بس أما تيجي بقى واحدة في الجواز أو في معاملة تكتشف إن شخص أناني فعلاً أناني فعلاً لا يهتمه إلا نفسه، صار

لا ييالي بزوجته، لا ييالي بمشاعرها، لا ييالي
بأولاده، لا ييالي بمشاعرهم هو صار بيتمحور
حوالين نفسه، هو عايز هو مشاعره بس هو
بس، أنتم بقى كلكم فلورز بالنسبالة، يعني حتى
زوجته وولاده أنتم مجرد فلورز برضو نفس
التفكير بيطبقه على أقرب الناس ليه صار لا
ييالي بأمه لا ييالي بأبيه تمام ما عنده إلا هم
نفسه بس، صار شخص لا يهمه إلا نفسه
تخلوا بقى لما يكون عندنا في البيت اتنين زي
دول بقى مش الزوج بس الزوج والزوجة كده
صار واحد شاب بقى له عشرة عشرين سنة
على الميديا ووحده عندها عشرة عشرين سنة
على الميديا هم قاعدين بيتربوا على المأساة
دي، اللي هو أنا صفحتي ذاتي تابعيني
اللايكات الكومنتات الإهتمام الشغف كل حياته

بيتابع إهتمام الناس بيه بس، تخيل الإثنين دول
إتجوزوا بقى يحصل إيه فيهم شكله قمور
وشكلها حلو تعالى ركبي على بعض نكتشف
مأساة يعني أصلاً مفيش حد مهتم بالتاني كل
واحد بيستغل التاني لمصلحته الشخصية بس
وده بنشوفه في أسر دلوقتي اللي بيقدوا
يصوروا في بعض عشان يأخدوا فيوز، حد
عايز يصور مراته عشان هو يجيله فلوس
وقاعدة بتصور جوزها وتعمل فيه مقلب عشان
هيا يجيلها فلوس، صار ما فيش ما فيش
كرامة، ما فيش واحد بيغير على مراته، ما
فيش واحدة بتراعي حرمة بيتها ولا حرمة
فرشها ولا حرمة أوضتها ولا حرمة أوضة
نومها، ولا حرمة مطبخها خلاص إحنا
دلوقتي أنا ما فيش حد مهم، لا حرمة بيت ولا

يهمني منظر جوزي ولا عيالي ولا يتقال علي
إيه؟ أنا المهم إن أنا أفرقع وأطرقع وأجيب
فلوس وأخلي يحصل يحصل بعد كده أنا ومن
بعدي الطوفان، دي ناس ده صار هموم صار
عندنا كارثة من الشخصيات السلبية تمامًا،
اللي هو صار عنده إستعداد يضحى بأي حد،
اللي هو بقي عندنا دلوقتي واحد بيطلع أنا
شفت الفيديو قريب، واحد طالع بيقول طلع
أبوه في الفيديو وطلعاه بشكل مسخرة وخلي
كل المتابعين يضحكوا على أبوه وقعد يبرر
بكده بيقول أصل أبويا ده صاحبي، أبوك
صاحبك لو أبوك صاحبك ما بتعملش فيه كده ،
لو أبوك صاحبك ما تعملش فيه كده، ما
تطلعوش يتهزأ كده ما تطلعوش الناس تضحك

عليه حتى لو هو رضى بكدا أنت ما
ترضالوش بكده،

حتى لو هو مجاملة منه حب يعمل معاك
واجب ويفرح الناس في صفحتك، أنت ما
ترضاش لأبوك يطلع كده، أنت ما ترضاش
لأمك تطلع كده، إزاي واحد يرضى يطلع أبوه
يطلع يتألس عليه والناس تضحك عليه في
الكومنتات؟ إعتبرني ده أنت كده ايه؟ سوا
فني وسوا كيوت والله والابن الفرفوش رزق
دا قلة أدب أقسم بالله، قلة أدب رهيبة أنا مش
متخيل واحد يعمل في أبوه كدا والله لو أبويا
هيطلع معايا في فيديو والفيديو دا هيجيب مليون
دولار والله أبدًا ما أطلعو يتهزأ التهزيء ده،
وأنا أطلع أمي في فيديو يتقال عليها كلام
علشان أأخذ أنا فلوس ولا علشان الناس تفرح

بياء، خلاص إحنا صار ناس والله ما يعرف أبوه ولا بيحب أبوه ولا بيحب أمه، هذه شخصيات لا تحب إلا ذاتها بس، لأن لا يمكن واحد يكون بيحب أبوه يعمل فيه كده، ولا واحد يحب أمه يعمل فيها كده أبدًا، ولا بيغير على بيته يعمل فيه كده يعني خلاص، هو في الحقيقة منظر بس هو شكله حتى في ضحكه مع أولاده وضحكه مع زوجته هو بيخدم على نفسه، تخيلوا بقى المأساة بعد كده عشان كده بنشوف الناس اللي هم المشاهير بتوع الميديا دول ما بيعمروش مع بعض أبدًا، على طول طلاق طلاق طلاق طلاق مشاكل قضايا محاكم؛ لأنه بيكتشف إن هي شخصيات لا تطاق؛ الشخص اللي فعلاً اللي بيتعاش معاه هو الشخص اللي بحسه خايف علي، شوفوا

سيدنا موسى، هم الأنبياء يا جماعة، لما قال
لأهله أمكثوا أمكثوا، شوف الراجل الراجل لما
يبقى راجل يا جماعة، بيعمل ايه؟ بيخاف على
مراته، بيخاف على عيلته، فقال لهم ايه؟ لما
حس إن في نار وإحنا ماشيين في وضع
صعب قال إمكثوا، تمام؟

إذا رأي نارًا فقال امكثوا، إني أنست نارًا
سأتیکم،

امكثوا يعني أنتم ما تتعرضوش لخطر، أنتم ما
تقربوش، أنتم ما تتصدروش في المشهد أنا
بس،

أنا اللي أشيل وأنا اللي أستحمل وأنا اللي
أتحمل كل شيء، ﴿إِذْ رَأَى نَارًا فَقَالَ لِأَهْلِهِ
امْكُثُوا إِنِّي آنَسْتُ نَارًا لَّعَلِّي آتِيكُم مِنْهَا بِقَبَسٍ
أَوْ أَجْدُ عَلَى النَّارِ هُدًى﴾ [طه: ١٠] ما قالش

لعلي بص حتى عفوية الهم، اللي هو زي ما
قلت لكم كده الهم ده شيء عفوي، ما قالش
لعلي آتينا وجمع نفسه معهم، قال لعلي آتيكم
وفيه أخرى سآتيكم

يتكلم عنهم هما بس وفعلاً من عفوية سيدنا
موسى في حمله لهم أسرته نسي يقول نفسه،
يعني هو نسي يقول نفسه قال هم بس، قال
سآتيكم ما قال سآتينا رغم ان هو نفسه سينتفع
بذلك لكن هو ما ذكرش نفسه أصلاً لعله يعني
من كثر إهتمامه بأسرته ما ذكرش نفسه،
تخلوا؟ يعني يا ريتنا يا جماعة يبقى همنا هم
النملة، هم النملة يا جماعة، النملة لما رأت
موكب سليمان-عليه السلام-، موكب سليمان-
عليه السلام-، ﴿حَتَّىٰ إِذَا أَتَوْا عَلَىٰ وَادِ النَّمْلِ
قَالَتْ نَمْلَةٌ يَا أَيُّهَا النَّمْلُ ادْخُلُوا مَسَاكِنَكُمْ لَا

يَحْطِمَنَّكُمْ سُلَيْمَانُ وَجُنُودُهُ وَهُمْ لَا يَشْعُرُونَ

[النمل: ١٨]، هم حمل هم الناس اللي حواليتها

قلبها على الناس اللي حواليتها، أنا اعتقد إن

النملة دي لو في عصر السوشيال ميديا بتاعنا

كانت عملت ايه؟ هتضحكوا بس أنا بقعد أتخيل

وشيلي كلمة نملة وحطي مية فيديو شوفتيه قبل

كده، كانت النملة دي عارفة عملت ايه لو هي

في عصر الميديا بتاعنا دوت وهي عندها

صفحة وكده كانت عملت ايه لما شافت موكب

سليمان؟ كانت طلعت موبايلها وصورت

موقف سليمان وهو معدي وعملت لايف، وبعد

كده صورت موقف سليمان وهو بيدوس على

النمل، اللي هم قومها وصورتهم، وهيه أنا

صورت تعالوا شوفوا الصور بتاعتي، وشوفوا

الفيديوهات اللي أنا صورتها عشان أجيب

ملايين المشاهدات، ما فكرتش حتى إن هي
تساعد ولا تتفاعل، أنا بستغرب من مشاهد
ببيقى في واحد قدامك مثلاً بيتضرب ولا
بيتأذى ولا واحدة بتتعاكس وأنت بتصور،
طب أنا السؤال هو اللي بيصور دوت ما
تحرّكش ليه اللي بيصور دوت طالما أنت
واقف وبتصور أنت ما تفاعلتش ليه؟ هو مش
عايز كده هو عايز ياخذ اللقطة إن شاء الله
اللي قدامي ده بيموت، أنا هستفيد بموته، موته
هبيقى هو اللقطة، أنا هصور واحد بيموت يا
جماعة، دي حاجة جميلة جدّا، تمام؟ أنا
هصور واحدة بتتلمس، بتتعاكس، بتغتصب،
بس أنا هاخذ اللقطة وهصورها بموبايلي
وهنزلها على صفحتي بسرعة نزل على
الصفحة، وخذ الترنّد وأطلع وشوف ويتقال

عليك وتنتشر وتنتشر، أنا بقول النملة دي لو
موجودة دلوقتي كانت صورت موكب سليمان
على اعتبار يا جماعة شوفوني أنا في دبي، أنا
في موكب سليمان تمام؟ ويمكن كمان كنت
تصور قومها وهم بيتداسوا بموكب سليمان
وهو مش حاسس علشان برضو تبقى صورت
فيديو مؤثر وفيديو شاعري وشايف فيديو يدمر
ببقي آفة، هم، النملة ما فكرتش في نفسها،

قالت يا أيها النمل ادخلوا مساكنكم، ما قالتش
مساكننا برضو زي سيدنا موسى، سبحانه الله
نفس الفكر يا جماعة، ممكن يكون في نملة
ممكن يكون في نبي، إن هو بتقول ادخلوا
مساكنكم، ما قالتش يلا بنا ما قالتش يلا بنا
ندخل مساكننا، هي مش بتكلم عن نفسها، هي
آخر واحدة هتتحرك هي مش هتاخذ اللقطة

خالص ولا عايزة تذكر، لكن روحوا أنتم
إدخلوا مساكنكم لا يحطمنكم، ما قالتش لا
يحطمننا حتى، من كثر همها على الناس ما
جابتش سيرة نفسها، لا يحطمنكم سليمان
وجنوده لكن من أدبها قالت هم لا يشعرون
فاعذرت لهم قالت هو النملة هو هياخد باله
من النمل، يعني هم هيقوا مش قصدهم بس أنا
ما أقدرش إن أنا أشوف المنظر دوت وأسكت،
تمام؟

شخص هم قومه، تمام؟ إحنا عندنا ناس كل
اللي همه إن هو اللقطة يعلق على الأحداث
بس، طيب تعال لي بقى تشوف بوسنات الناس
مثلاً لما الأسعار تغلى مثلاً، طيب بتلاقي ناس
بقى ايه؟ كوميكس سخيف نزل بوسنات
والأسعار بتغلى، والدنيا بتبوظ والبلد، ماشي

طيب أنت عملت كل ده وخذت لك ايه؟
وسفيت مع اللي سفوا وضحكت مع اللي
ضحكوا، وكوميكسات مع الناس اللي عملوا
كوميكسات، أنا عايز أسألك سؤال والسؤال ده
أنا عارف هيخرج كل الناس اللي قاعدين
دلوقتي قدامي، ممن تفاعل بشكل كوميدي أو
عايز يبقى قلت رأيي في الأزمة اللي حاصلة
الأخيرة سواء الأسعار سواء التعويم سواء
سواء، أسألك سؤال طلعت شنطة لأي فقير؟
طلعت شنطة لأي فقير من بعد رمضان من
بعد ما حصلت الأزمة والأسعار غلت كم
شنطة طلعتها للفقير؟ أنتي وأنت بقيت واحد
من دول بس أنت مش واخد بالك أنت بتستغل
آلام المساكين علشان تاخد اللقطة أنت بتستغل
الأزمة الحالية علشان تعمل بوست جميل

يجيب تفاعل، عشان تسف مع اللي بيسفوا بس
عشان تعمل كومكس الله أنت لطيف أوي، لكن
أنت ما جاش في بالك جارك جعان ولا لا؟ ما
جاش في بالك تعملي شنطة بدل كل ده، فعلاً
لا يحطمنكم، لعلي آتيكم، أنا دلوقتي واقع أليم،
ليه أنا ما تحركتش في الواقع الأليم دوت؟

وفعلاً ساعدت أسرة مسكينة ليه؟ ليه أنا ليه أنا
تمحورت حوالين ذاتي في أزمة زي ديت؟
وما فكرتش أطلع صدقة بعد كل اللي أنا عملته
دوت؟ ما هو مش لازم أكون بصور واحدة
بتغتصب، ولا بصور واحد بيتقتل، إحنا بنعمل
كده، بس في مستوى أضيق، مستوى ثاني،
مين فينا حمل هم الأمة؟ مين فينا حمل هم
الناس مين فينا فعلاً طلع من جيبيه وطلع
صدقة، ولا إحنا الشاطرين بس في

الكوميكسات والسف على الواقع والسخرية من كل شيء حوالينا، لكن ما فيش حاجة ما بنغيرش حاجة ما نغيرش واقع قاعدين بنستغل الواقع لخدمة نفسنا، نستغل آلام الناس وأحزان الناس عشان أخدم نفسي أنا، عشان أخدم صفحتي أنا، عشان أعمل بوست سف حلو علشان أقول كلام وأتابع لايكات وبس أنا بتابع لايكات متخيلين يعني ايه؟ أنت بتتكلم في زلزال؟ ولا بتتكلم في فيضان؟ ولا بتتكلم في حادثة قتل؟ وأنا بالبوست اللي كتبتة كان هدفي فيه أشوف اللايكات وأنتم متخيلين البرود اللي إحنا فيه؟ أنا أسف متخيلين انعدام الدم اللي إحنا وصلنا له؟ إن أنا الفترة دي بقيت بستغل أحداث الأمة الرهيبة إن أنا أجمع لايكات ما بقاش في التألم ما بقاش فيه الأذى ده الحاصل،

ده الحاصل، لما نشوف دلوقتي زلزال خد
آلاف من إخواننا المغاربة، وفيضان قتل
عشرات الآلاف

من إخواننا الليبيين مسلمين، تمام؟ وبتجد
خلاص، زمان كان بيلاقى تفاعل، أنا دلوقتي
مش بنلاقي تفاعل أصلاً خالص، خالص، ما
فيش حد بيتفاعل، ما فيش حد بيتفاعل، ما فيش
حد بيتأثر، إحنا وصلنا لايه؟ إحنا وصلنا
للشباب هو هو همه نفسه، ده إحنا ما وصلناش
لمرحلة النملة، ما وصلناش النمل، أنتم
متخيلين إحنا بنتكلم في ايه؟ **(إِنَّ سَعْيَكُمْ لَشَتَى)**
[الليل: ٤]. تمام؟ هم، هم من من فعلاً؟ هم
الأمة، من فعلاً همه الشباب؟ برضو نفس
الكلام إحنا نقعد نتكلم في إن الشباب بيضيع
ماشى يا عم، الشباب بيروح مننا ماشى يا عم

الدقيق ده يا جماعة ليه؟ إحقوا في حملة على
النقاب، في حملة على المش عارف ايه؟

في إحنا الدنيا بتضيع الناس بتصد عن سبيل
الله أنت عملت ايه؟ برضو أنت مجرد مناحة
على صفحتك الشخصية، تمام؟ مجرد برضو
كل حدث بيتحول مناحة على صفحتك
الشخصية لكن انت بقى فين؟ فين الدعوة؟ ما
هو الواقع مش هيتغير بالمناحات، هيتغير
بالدعوة إلى الله، أنا دلوقتي بشعر إن الأمة في
خطر دلوقتي وفي ناس بتصدنا عن سبيل الله،
تمام؟ وأنا عايز دلوقتي أتفاعل إيجابيًا، فين
همك الدعوي؟ بنتكلم في مؤمن آل ياسين، تمام
مؤمن آل ياسين ده من أعجب الدعاء، عارفين
ليه؟ لأنه في الحقيقة حمل هم الدعوة، في واقع
مكانش محتاج دعاه أصلًا؛ لأن القرية دي ربنا

قال (أرسلنا إليهم اثنين فكذبوهما فعززنا
بثالث)، يعني قرية واحدة قرية، يعني حاجة
مش ضخمة، قرية تمام؟ فيها ثلاث رسل،
قرية فيها كم رسول؟ ثلاث رسل، ثلاث رسل
لقرية واحدة، رغم ذلك هو مسكتش (وجاء من
أقصى المدينة) يعني أصلاً أصلاً الموضوع
مكنش محتاج؛ لأن فيه ثلاث رسل فالدعوة
قائمة بكفاية، وهو أصلاً بعيد جداً، بعيد جداً،
جاء من أقصى المدينة، يعني من آخر الدنيا
يسعى جاي جري يبص، فعلاً الهم بيحمله،
الحركة دي زي ما قلت لكم، في واحد يقول
كان ممكن مؤمن آل ياسين ده يقعد، انا بقول
بردو لو مؤمن آل ياسين ده كان في عالما ده
عارف كان هيعمل ايه؟ كان هيقعد في مكانه

عادی مش هیخرج من أوضته أبداً، مش
هیخرج من أوضته

■ كان في عالمنه ده عارف كان هیعمل ایه ؟

كان هیقعد ف مكانه عادی مش هیخرج من
اوضته أبدا مش هیخرج خالص وكان كل اللي
هیعمله هینزل بوسه كده محترم ویقول یا
جماعة مش كده یعنی الدنيا بايظة الشباب
ضایع وعایزین نشغل شویة والدنيا رايحة
فین؟ ایه رأيكم في البوسه الجمیل ده بتاعي
ها؟

كان قاعد في اوضته انا ایه اللي ینزلني یا عم
وانزل واغیر واقع واسعی واكلم الشباب واكلم
البنات واقعد اتعب واستحمل تألیف وسخرية
واتحمل هم الدين ای الجو ده ؟

طب ما انا بكتب بوست وانا قاعد على السرير
بيان فيه إن أنا بص نبي صحابي قاعد، جامد
جدًا انت عايز ايه؟

خلاص انا ايه اللي يخليني احتك بواقع واغيره
والكلام دا؟

لا مؤمن آل ياسين واحد تاني غيرنا خالص
شاف إن الواقع مش هيتغير إن أنا اقعد في
البيت ولا هيتغير بالتفاعلات المحدودة
الشخصية نزل، نزل للواقع {وَجَاءَ مِنْ أَقْصَى
الْمَدِينَةِ رَجُلٌ يَسْعَى} قَالَ يَا قَوْمِ اتَّبِعُوا
الْمُرْسَلِينَ (20) اتَّبِعُوا مَنْ لَا يَسْأَلُكُمْ أَجْرًا
وَهُمْ مُّهْتَدُونَ (21) وَمَا لِي لَا أَعْبُدُ الَّذِي
فَطَرَنِي وَإِلَيْهِ تُرْجَعُونَ (22){

وقعد يدعوهم الى الله سبحانه وتعالى.

فين البنت اللي بتديني وقت جزء من الوقت
اللي بتقعدوا كثير قوي على الميديا تدي وقت
كده تروح مثلاً واقفة مع بنت في الجامعة
تكلما بس.

تقعد كل يوم كده في الجامعة تقول من اورادى
اليومية إن انا هشوف أي بنت كده في الجامعة
هسلم عليها وهضحك في وشها والله ازيك يا
حبيبتى عاملة ايه؟ انا بحبك في الله وكننت
عايز اقول لك كلمتين كده لله.

تنصحها مثلاً صلاة الفجر، تنصحها مثلاً اي
نصيحة، مش لازم تنكر عليها منكراً بتعمله
مثلاً دلوقتي عادي نصيحة عادية وخلّاص
بس.

تقول لها انا صاحبك فلانة ودي نمرتي لو
عوزتي اي حاجة اتصلي بي كلميني انا معك
في اى وقت ده واقع بيتغير.

شوف بقى واحدة زي دي لو كل يوم بتعمل
كده لو قعدت خمس سنين في الكلية ممكن
تعمل تغيير قد ايه؟ تسيب بصفة قد ايه في
الكلية؟ بصفة لو عملت الاف البوستات مش
مش هتعمل بصفة زي دية تمام؟؟

لو فعلا كل واحد قال انا كل ما اركب مواصلة
هقول للناس نصيحة كده وخلاص أو أوزع
مطويات كده ورق بسيط فيه حاجة بسيطة
كده هم واحد مشغول، جاء من اقصى المدينة
رجل يسعى قال يا قوم اتبعوا المرسلين ايه هو
همك؟

الناس يا جماعة كان بالنسبة لها فكرة التركيز على الهدف دا اللي هو فعلا الموضوع شاغللك لدرجة إن مؤمن آل ياسين ده ده من كتر همه فعلاً يعني دعا قومه بعد الموت قتلوه انتم عارفين إن مؤمن آل ياسين اتقتل فعلاً.

فقال {يَا لَيْتَ قَوْمِي يَعْلَمُونَ (26) بِمَا غَفَرَ لِي رَبِّي وَجَعَلَنِي مِنَ الْمُكْرَمِينَ (27)}

انتم متخيلين إن الهم غالب عليه لدرجة إن هو مخدش باله من مرارة الظلم اللي حصلت يعني هو اتقتل فهمه الدعوي كان اغلب من مرارة الظلم اللي حصلت عارفين عامل زي ايه؟

زي مثلا انت دلوقتي أهم حاجة عندك إبنك وكل واحدة في العالم اهم حاجة عندها ابنها حلو الكلام، فأنت ممكن مثلا ابنك كان هيقع بضرب مثال.

فمن كتر ما انت شففيه كده ماشي على سور
البلكونة لا قدر الله فشايهاها بيكمل فجريتي
علشان تلحقيه، وانتي بتجري رجلك اتخبطت
في حنة ازاز فتعورت وكتفك خبطت في سور
البلكونة فحصلك كدمة ومسكتي ابنك تمام
هتبقى فرحتك بأنك مسكتي ابنك طاغية على
كل شيء لدرجة أن ممكن تقعدتي فترة مش
مستوعة لسه إنك اتعورت ولا ان في كدمة
في كتفك تمام؟

هتقعدتي فترة تستوعبي اللي حصل؟ لغاية ما
تظمنى على ابنك خالص وبعد كده، ايه دا انا
متعورة.

نفس الفكرة الفكرة إن ده واحد غالب همه
الدعوي غالب عليه لدرجة إن مرارة الظلم

نفسها ومراره القتل مكنتش هي المتصدرة
المشهد.

من كثر همه الدعوي غلبت الهمة الدعوية
على مرارة القتل والظلم وبالتالي قال بكل
عفوية {قَالَ يَا لَيْتَ قَوْمِي يَعْلَمُونَ (26) بِمَا
غَفَرَ لِي رَبِّي وَجَعَلَنِي مِنَ الْمُكْرَمِينَ (27)}

ناس هدفها واضح مبترضاش به بديل ودايما
يا جماعة تعرف امتي همك برضو من
العلامات اللي تدل على همك إن هو مبيحلس
منك يعني ايه مبيحلس منك؟

يعني انت مبتعرفش غيره وما بتسمحش لحد
يغيره وما بتاخدش بالك من اي حاجة الا هو
وممكن تنسى حاجات كثير بسببه.

وأي حد يحاول يحيّدك عنه تعتبره عدو
متعرفش ان انت تتعامل معه تمام؟ زي
الصحابي كده.

النبي عليه الصلاة والسلام كان في غزوة فكان
في توزيع غنائم وبتاع فكانوا لسه في معركة
تانية فجّه النبي عليه الصلاة والسلام بيدي له
جزء من الغنيمة بتاعته فقال له مش عايز حاجة.

قال له انت عايز ايه؟ قال له ما اتبعك على
ذلك قال له امال انت اتبعني على ايه؟

قال انما اتبعك على ان اضرب بسهم ها هنا
فاقتل فادخل الجنة.

ده كلام زي ما احنا بنقول كلام احنا بنقول
كلام، احنا همنا الدين وهمنا الدعوة وهمنا اهم
حاجة الدعو ده كلام.

فقال النبي عليه الصلاة والسلام ان تصدق الله
يصدقك والله لو انت صادق ربنا هيكرمك..

بعد شوية دخلوا معركة تانية وجابوا الراجل دا
محمول على الاعناق ميت.

وخذ سهم في نفس المكان اللي اشار إليه
متحركش سنتي عن المكان اللي شاور عليه
لدرجة النبي عليه الصلاة والسلام بيقول اهو
هو؟ ده اللي كان بيكلمني من شوية.

اهو هو؟ قالوا نعم هو قال صدق الله فصدقه
الله

عشان كده اخواتنا واخوانا اللي بيسمعوني
دلوقتي اللي بتقول انا بقالي مدة مش بحفظ
قرآن انا بقالي مدة مش عارف انتظم في
دورات علمية بقالي مدة مش عارف اغير

حاجة في حجابي لان في الحقيقة يبدو ان
الموضوع امني وكلام.

مكنش فيه صدق اوي في الموضوع وانما انت
اكثر صدقا مع الجانب الاخر آسف إن انا
سأوجعك بهذا الكلام.

احنا زي ما قلنا احنا عندنا ناحيتين يتجاذبونا
ناحية حلوة فيها صلاة وقرآن وخدمة اهل
وزوج وولاد والكلام ده وناحية فيها ميديا
وتفاهات وسفاهات وقلة ادب ومعاصي وشمال
والكلام دا دي بتشدني ودي بتشدني واغلبننا
زي ما قلنا يعني شوية هنا وشوية هنا.

لكن احيانا بيبقى صدقي مع احد الاطراف
اكثر من صدقي مع الطرف الاخر فلما تلاقي
نفسك دائما فاشلة مع طرف والثاني سالك
معاكى بيبقى للاسف يبدو ان الصدق مع

الطرف الاخر اكثر من الصدق مع الطرف
الجيد عشان كده مش مش سالكة اولاً نصدق
مع الله فعلاً يكون الكلام ده بجد.

☞ انا عايز احفظ قرآن بجد

☞ انا نفسي اكون ملتزمة بجد.

☞ انا نفسي البس نقاب بجد.

☞ انا نفسي اكون محافظ على صلاة الفجر
بجد.

مش مجرد عملية تأثر وقتي بلايف زي دا او
كومت تبعته مثلاً للتعبير عن الشجون.

لكن حقيقة راسخة في النفس موضوع شاغل
الانسان زي ما بيشغلك الرحلة وبتصحي لها
زي ما بيشغلك الامتحان فبتصحي زي ما

بیشغلک ولادک فبتصحي لهم زي ما بیشغلک
ولادک فبتذاکريلهم بتلاقي همّة لمذاکرة ولادک،
همّة انک تصحي لهم مهما کان مدرستهم حتی
لو ده بیصحي قبل ده بساعة وده بساعة بتلاقي
نفسک صحيتي للاتنين.

﴿طب ازاي ما بتصحيش الفجر بعد کل

داهیه؟؟؟

لان انت صادقة فعلا مع اولادک کويسة مش
وحشة على فکرة بس مفیش صدق اوي مع الله
سبحانه وتعالى.

عشان کده بنقول الهم ده هو اللي بيدفعک الهم
هو الدافع هو ده اللي بيخليک مدفوع انت بتبقى
مدفوع انت مينفعش تقوله لا، الهم يا جماعة
يعني ايه الهم؟

الهم دي الحاجة اللي انت متقدرش تقولها لا
انت مدفوع في اتجاهها لان هي قوية لدرجة
ان هي مسيطرة عليك فعلا زي ما انت كده
هضرب لكم مثال وتقولوا لي اه او لا عشان
نفقس نفسنا مش انتم احيانا تبقوا قاعدين كده
على الموبايل قاعدين تقلبوا تقلبوا ساعه وكل
خمس دقائق انت بتقولي لنفسك كفاية ومش
قادرة وبعد كده تقلبي وبعد كده تقولي لنفسك
كفاية ومش قادرة كل خمس دقائق بتقولي
كفاية وقاعدة برضه بتقلبي ده اسمه ايه؟؟ هم
زي بالضبط واحد كده همه الصلاة قيام الليل
ده همه مثلا واحد يجي يصلي يقول هصلى

يجي مثلاً يصلي يقول هصلي مثلاً أربع ركعات، يلاقي الدنيا حلوة معاه فيصلي ستة، يصلي ثمانية.

كان مثلاً يقول اصلي الركعتين في ربع ساعة، يلاقي ركعتين خدوا نصف ساعة. والصلاة حلوة ومكلمة مش قادر اطلع منها يا جماعة، مش قادر اطلع.

زي عبّاد ابن بشر أنتم عارفين لما كان بيقرأ كان بيصلي بسورة الكهف، وأحد المشركين ضربه بسهم وهو بيصلي نزع السهم ورماه وكمل صلاته أنت بتتكلم إزاي؟

وأحد السلف بيقول أنا منذ أربعين سنة ما أزعجني إلا آذان الفجر، يعني إيه أزعجني آذان الفجر؟ يعني آذان الفجر بالنسبـاله اه هـنصلي الفجر دي حاجة كويسة، بس آذان

الفجر ده له معنى ثاني بالنسبالة مش حلو. إيه هو؟ إن قيام الليل خلص.

هو قاعد يصلي، أول ما بيسمع آذان الفجر اللي هو يووه قيام الليل خلص، فيبقى متضايق بقى أوي.

ده هم ، يعني ده نفس الفكرة إن أنا قاعد على الموبايل وقاعد أقلب مش قادر أبطل. ف دول ناس مش قادرين يبطلوا.

أبو هريرة كان يسبح في اليوم 12.000 تسبيحة. أنت بتتكلم في إيه؟

فاللي عايز اقوله إن الهم ده بيسيطر على الواحد لدرجة إن هو بيفكر فيه صبح وليل. بيسيطر عليه فعلاً ده اللي بتعرفي به همك.

مش الهم يا جماعة هو العارض اللي بيجيلك
لأ، ولا خاطر السريع اللي بيعدي عليك
خالص، ده مش همك.

الهم مش هو الحاجة أو خاطر اللي بيعدي
عليك كل فترة، ولا الموضوع اللي كل فترة
كده بيتجدد في ذهنك، لأ مش ده همك. "همك
ما أهمك" ديه حاجة اللي أنت مش بتعرف
تطلعها. اللي هي مسيطرة عليك، لدرجة إن
أنت ممكن تبقى بتنشغل بها حتى في الوقت
اللي مينفعش تنشغل بيها.

زي ما قولنا مؤمن ال ياسين دعا قومه وهو
ميت، طب أنت ميت، هما هيسمعوك؟ بس أنا
مش عارف حتى رغم إن المكان مش مناسب
للدعوة يعني ولا حد هيسمعني بس أنا من كتر
ما أنا مهموم حتى بطفح بهمي ده حتى في

المكان الغير مناسب. يعني أعطيك مثال، أنتم عارفين جابر بن عبدالله بن حرام، أبوه عبدالله بن حرام دخل غزوة أحد وقُتل فيها

فجابر كان عنده أخوات بنات كثير فكان مشغول أوي مهموم بيهم، فالنبي عليه الصلاة والسلام لقيه فقال مالك يا جابر؟ قال يعني أبويا ميت يعني بديهي أبويا ميت وأخواتي كثير فأنا مهموم بالموضوع ده، قال يا جابر أبشر يا جابر، والله ما كلم الله أحد من خلقه كفاعًا يعني بغير حجاب إلا أباك، كلمه كفاعًا يعني بغير حجاب. وقال عبدي تمن عليّ فقال يارب أتمنى أن أرد إلى الدنيا فأقتل فيك مرة ثانية، اللي هو المكان مش مناسب، وديه أمنية أنت عارف إن هي مش هتحصل، بس هو مش قادر مسيطرة عليه لدرجة إن هو معنديش

غيرها، أنا دماغي مش رايحة في أي حاجة
تانية، قال يا رب أتمنى أن أرد إلى الدنيا فأقتل
فيك مرة ثانية.

فقال يا عبدالله إنه قد سبق القول مني وأنهم
إليها لا يرجعون.

يعني ده طلب منافي للي أنا قولته قبل كده في
كتابي، مينفعش.

ونفس الكلام في شهداء أحد كما جاء في
الحديث طبعًا ماتوا الشهداء فربنا جعل
أجسادهم في حواصل طير تسرح في الجنة
حيث شاءت، قال في الحديث فأطلع إليهم ربهم
إطلاع، فقال هل تريدون شيئًا أزيدكم؟ قال يا
رب يعني وما نريد؟ قال تمنوا عليّ، أي حاجة
هتطلبوها هعملها لكم. قال يا رب نريد أن نُرد
إلى الدنيا، ترد إلينا أرواحنا ونرجع ثاني الدنيا

حتى نقاتل فيك. ونُقتل مرة ثانية، قال قد سبق
القول مني أنهم إليها لا يرجعون، قالوا يارب
فبلغ عنا قومنا يعنى طالما مش هنرجع طب
قول لهم إحنا مبسوطين إزاي فنزل قوله تعالى
(ولا تحسبن الذين قتلوا في سبيل الله أمواتًا
بل أحياء عند ربهم يرزقون فرحين بما أتاهم
الله من فضله ويستبشرون بالذين لم يلحقوا
بهم من خلفهم ألا خوف عليهم ولا هم
يحزنون يستبشرون بنعمة من الله وفضل وأن
الله لا يضيع أجر المؤمنين)

فالشاهد يعنى إن الناس مسيطر عليهم الهم
لدرجة إن هما بيطلبوه في وقت مش هو، بس
أنا معنديش غيره أنا مش عارف حاجة ثانية
يعني هو ده اللي شاغلني.

سبحان الله! يعني يا جماعة أنا مش عارف
اقول لكم إيه الصراحة الكلام كتير والكلام
صعب. يعني لو قولنا مثلاً، هم شاغل واحد
فعلاً يعني مبيعرفش يحل منه، واحد جاء للنبي
عليه الصلاة والسلام، متخيلين بقى واحد من
كثر ما هو يفكر في حاجة مسيطرة عليه جداً،
لدرجة إن ان الحاجة ديه عارفين لما تبقى في
حاجة مسيطرة عليك برضوا من علامات
الحاجة اللي هي مسيطرة عليك عارفين إيه
علاماتها؟ إن هي بتبان عليك على طول،
فاللي يشوفك يحسها.

فلو أنت همك الدنيا ببيان عليك، لو همك
الآخرة ببيان عليك، لو أنت مشغول بقيام الليل
ببيان علي وشك، لو أنت مشغول بطلب العلم
بيان على كلامك.

عايز أقولكم مثال ﴿٤﴾ إن كان في رجل من
الأنصار كان قاعد قدام النبي عليه الصلاة
والسلام من غير ما يتكلم، من غير ما يُبادر،
النبي عليه الصلاة والسلام قاله يا فلان
مالك؟ ما يحزنك؟ أنتم متخيلين يا جماعة حس
النبي عليه الصلاة والسلام عامل إزاي؟
شفافيته عامله إزاي؟ فرسه عامله إزاي؟
اهتمامه بأصحابه عامل إزاي؟ إحساسه بهموم
الناس عامل إزاي؟ قال يا فلان مالك؟ ما الذي
يُحزنك؟ شكك في حاجة شاييل همها، هو
عارف الإجابة هتكون إيه، حاجة في الدين
أكيد الناس ديه مبيهمهاش إلا كده، تخيلوا بقى
الراجل ده همه عامل إزاي؟ حاجة خيال
علمي، حاجة مش هتصدقها، تخيلوا إيه الهم
اللي الشخص ده شايله؟

قال يا رسول الله: إني حين أكون في بيتي حين أكون في بيتي فأشتاق إليك وأشتاق إلى رؤياك وأشتاق إلى حديثك وأشتاق إلى مجلسك فإني أخرج من بيتي وآتيك وأكلمك وأنظر في وجهك وأتلف بحدِيثك واستمتع بصُحبَتك، قال له: طب إيه المشكلة؟

قال: ولكني منذ ليالٍ وأنا أتفكر في الآخرة فقلت في نفسي حين يدخل رسول الله صلى الله عليه وسلم الجنة فسيكون مع الأنبياء وسيكون في المحل الأعلى من الله وأنا إن دخلتها، إن دخلتها فأين أنا ورسول الله صلى وسلم فأن لمثلي أن يراه، فحملت هذا الهم وهذا الذي يشغلني ويحزنني يا رسول الله أني لن أراك في الجنة.

إيه ده إيه ده يعني ده أنت في الجنة جوا الجنة
يعني جوا الجنة وبيقول أنا ده اللي شاغلني أنا
هشوفك إزاي ما أنا حتى لو دخلتها ما مستحيل
ما أنا مش ممكن ابقى في نفس منزلتك مش
هيحصل يبقى مش هشوفك طب أنا بالنسبة لي
ده موضوع مزعج تاعبني أوي أنا بقالي أيام
بيكي، مش ببيكي عشان هو مش هيخش
الجنة لأ، ببيكي عشان لو دخلت جنة وأنا
هشوف الرسول إزاي أنت عمرك فكرت في
الموضوع ده؟ أنت عمرك شاغلك أصلاً
الموضوع ده أصلاً؟ ده في بالك؟ أنت أصلاً
بتقتدي بالنبي صلى الله عليه وسلم أصلاً؟ ده
دول اللي بيقعدوا بالنبي أنت أصلاً بتقول كده
بس بحب النبي، لكن أنت لكن أنت مش باين
على سلوكك ولا هاديك ولا طريقة نومك ولا

طريقة أكلك ولا طريقة لبسك ولا أذكارك ولا
أي حاجة مافيش دليل على إن في حب حقيقي
للنبي عليه الصلاة والسلام، ونيجي نتخايق في
المولد بقى هو المولد ده هو بالنسبة لنا ديه
علامة الحب الوحيدة خلاص تمام ولما واحد
يقول يا جماعة المولد ده مش من السنة، إيه
أنت مبتحبش النبي.

■ **هو ده حب النبي؟** ده حب النبي اللي
الراجل ده بيقول عليه، عمرك جه بالك كده؟
جه في بالك القصة ديه؟ إن أنا فعلاً اشوفه
إزاي يوم القيامة؟ فالنبي عليه الصلاة والسلام
طبعاً إيه زي ما تقول كده إيه مش عارف
يقول له إيه مش عارف يقول له إيه معندوش
وحي يحل المشكلة ديه، ميعرفش هو كلامه
منطقي، هو بيقول كلامك منطقي بس يعني

الهم ده أنا معرفش، مش عارف أعملها إزاي
لغاية وقف النبي عليه الصلاة والسلام مكانه
منتظر الحل من الله، فنزلت الهدية من الله،
نزل قول الله تعالى

﴿وَمَنْ يُطِعِ اللَّهَ وَالرَّسُولَ فَأُولَئِكَ مَعَ الَّذِينَ أَنْعَمَ
اللَّهُ عَلَيْهِمْ مِنَ النَّبِيِّينَ وَالصِّدِّيقِينَ وَالشُّهَدَاءِ
وَالصَّالِحِينَ وَحَسُنَ أُولَئِكَ رَفِيقًا﴾

لأن هي ما تجيش غير كده لازم فضل، ذلك
الفضل من الله وكفى بالله عليما.

فقدر ربنا إن في الجنة إن ممكن الأعلى ينزل
الى الأدنى، عشان يقابله وإن إحنا نتقابل في
سوق الجنة، وإن إحنا يكون لنا لقاءات مع

الأنبياء أحياناً، وإن إحنا نقابل الناس اللي أعلى
مننا في بعض الأماكن.

يعني حيبقى في لقاء في الجنة بين الأعلى
والأدنى، علشان يعني رحمة بالأدنى.

بس يكون ممن أطاع الله وأحب الله فعلاً،
حيبقى فيه نوع من الإيه؟ المخالطة مع هؤلاء
الأكابر، وكل واحد هيخالطهم على قد ما كان
عمله، لكن ما فيش حد هيتحرم من مخالطة
هؤلاء الصالحين والأنبياء.

فاتحلت مشكلة الراجل وحل لنا مشكلة كبيرة
جداً، علشان هم ده نفعا احنا وعاد علينا احنا
بفائدة.

ففي هموم بتحل مشاكل الآخرين، كمان
سبحان الله طيب إحنا فين من الطاعة؟ فين
طاعتك؟

أنت ما بتصلش الفجر حضرتك. أنت ما
بتصلش قيام ليل.. أنت لسه يعني بتتكلّم بقى
في الإيه؟ في الحجاب.. لسه بتفاصلي في
البنطلون أنت لسه بتلبسي بنطلون تمام؟

أنت لسه بتلبس سلسلة، أنت لسه...

إحنا فين؟!!

إحنا بننام غلط، وبناكل غلط، أحلامنا، غلط
همومنا غلط..

تمام؟ فالناس لأ، تعبانة لسبب فعلا، الله
المستعان ..

طولت عليكم لسه عندي شوية حاجات ثانية
بس مش عايز أطول، خايفني أختم لكم بأمثلة
سريعة مش هطول فيها بقى، أنا هقولها
وخلص عشان أنا تعبت، حسرت مجموعة من
الهموم، هقول الهم الأولاني وبعد كده هقول
أربع خمس هموم تحت عنوان واحد..

 الهم الأولاني ده كلنا حافظينه فمش
هطول فيه أوي.

بس المحرج إن هو ده كان هم اتنين في ثانية
إعدادي، المحرج من الهم اللي هقوله ده هم
اتنين في ثانية إعدادي، مين الاتنين اللي في
ثانية إعدادي؟ دول اتنين صحابة معاذ ابن

عمرو ابن الجموح والثاني اسمه إيه؟ الثاني
اسمه معوذ ابن عفراء.

معاذ ابن عمرو ابن الجموح ومعوذ ابن
عفراء، الاثنين دول واحد عنده ثلاثة عشر
والثاني عنده اربعة عشر عاما .

يعني واحد في تانية اعدادي وواحد في ثلاثة
اعدادي بالنسبة لنا. اللي هو بالنسبة لنا آسف
عيل تافه آخره يلم جزر في لعبة ستيب وي
واي تمام يلم كوينز في لعبة ده ده لو بيعمل
كده يبقى ده عيل ايه جامد جدا ولو لعب بابجي
بيبقى جامد تمام ولو حافظ شوية رابات وشوية
مهرجانات وشوية آآ تمام زي ده بالنسبة لنا
ايه ده كده عيل فهمان ودائس ويا سلام بقى لو
بينزل نادي ويلعب كرة وبيتابع بقى رونالدو
وبيتابع ميسي ويحلم بأن هو برشلونة ده

بالنسبة لنا هو ده النموذج بتاع عيل في ثانية
إعدادي أو الثالثة إعدادي فعشان كده بنسميه
عيل هو ده آخره بالنسبة لنا لكن دول ما
ينفعش يتقال عليهم كده. يعني انا حاسس إن أنا
قلت كده بشتهم يعني أنا لا ده أنا اللي عيل
بالنسبة لهم يعني أنا لو لو اللي انا هقوله ده ده
دولت تلتاشر بيقى انا اللي عيل آسف يعني انا
بجد انا مش بهزر العيل لو ده هم ناس عندها
تلتاشر سنة لو كان في جيل في الإسلام ده كان
هم الناس اللي عندها تلتاشر سنة لما تيجي
غزوة بدر غزوة بدر ويجي الناس في غزوة
بدر بقى المسلمين اصطفوا والمشركين
اصطفوا وعبدالرحمن ابن عوف واقف
عبدالرحمن بن عوف ده جامد بتتين بقى فيجي
اتنين حواليه كده الاتنين دول جاين حواليه

وقاعد في يوم يقول له يا عمي يا عمي عشان
هو صغير يقول يا عمي أين أبا جهل؟ أبو جهل
مين يا ابني انت عايز ايه من أبو جهل؟

انت مالك أنت ومال أبو جهل؟ يلا أنت مالك
عايز ايه من أبو جهل قال سمعت لإن طبعاً
الأنصار ما شافوش قبل قال سمعت إنه يسب
رسول الله صلى الله عليه وسلم. سمعت انه
يسب رسول الله صلى الله عليه وسلم. فوالله
والله والله لا يفارق سوادي سواده. حتى يموت
الأعجل منا، وبعد كده معوذ ابن عفراء
يجيله من الناحية الثانية يقوله يا عمي دلني
على أبي جهل قاله أنت تاني أنت واحد تاني
أنتوا مالكو يا جماعة أنتوا بتهزروا انتوا اتنين
اتنين صغيرين أنتوا مالكم ومال أبو جهل انتوا
قالي معلىش قولي بس هو فين وملكش دعوة

سمعت إنه يسب رسول الله صلى الله عليه وسلم والذي نفسي بيده لا يفارق سوادي سواده حتى يموت الأعجل منا على راحتكم بس انا شايف إن أنتم أقل بكثير أوي إن أنتم تقدرُوا أبو جهل بس لما شافوا قال لهم شايفين غابة الرماح دي الحرجة دي شايفين غابة الرماح دي قالوا له أه قال لهم أبو جهل في النص بقي وعلى راحتكم بقي تعرفوا توصل توصل له إن هو كان متحوط عليه بكمية فرسان مهولة غاب من الرماح تمام؟

فقالوا له طيب سبنا إحنا بقي. قعدوا طول المعركة من دماغهم هنجيب أبو جهل إزاي لغاية فعلا حصل خلخلة كده في الصفوف في لحظة فحصل إيه إن في فرجة في الآيه في الصف كده

فاتفتحت الايه؟ الغابة من الرماح دي، جري
معاذ بن عمرو من الجموح وضرب أبو جهل
ضربة بيقولوا اظنت قدمه بنصف ساقه ضربة
واحدة من سيفه طيرت نصف ساق نصف
ساق ابو جهل الجزار عشان يكسر حثة
عضمة بيقعد يخطب كام خبطة بساطور بيد
الجزار لا معاذ اللي عنده تلتاشر سنة من
غضبه لله ضرب أبو جهل ضربة ضربة
واحدة طيرت نصف ساقه ايه الغضب ده ايه
الغل ده ايه ايه الغيظ ده ايه الحماس

دا اللي يضرب واحد عنده تلاتاشر سنة
يضرب فحل زي أبو جهل ضربة يطير له
نص رجليه بضربة واحدة!

ده مش طبيعي مش طبيعي ما جزار ما
يعرفش يعملها تمام

وهو بيتعامل مع العضمة بس ده طائر بالحم
بالعضم بكله. طارت. وجه معوز ابن عفراء
من الناحية الثانية وهو راح ضربه ضربة
على كتفه راح هوب اتقلب أبو جهل وقع على
الأرض تمام معاذ ابن عمرو من الجموح خد
بالك بقى استنى ده هو أبو جهل خلاص كان
بيخلص وبيموت وجه عبدالله ابن مسعود كمل
عليه بس هم كانوا سبب قتله معاذ بقى أنا
عايز بس تكمله عشان في حنة مؤلمة يا تبقى
صعبة شوية بس خدوها مني وخلاص معاذ
ابن عمرو ابن الجموح بيقول بعد كده هجم
علي عكرمة ابن ابي جهل عكرمة هجم على
معاذ الأولاني دوت اللي هو ضرب رجل
ابوه. قال ضربني ضربة على كتفي فخلع قطع
كتفه بيقول فصارت ذراعي معلقة بقطعة من

الجلد. بقت خلاص مدلدلة كده اتقطعت وبيقول
مدلدلة بحتة جلد كده بقى خلاص بيقول
فصرت أقاتل عامة يومي وأنا أجرها بيقاتل
بالإيد الثانية ما قالش أه تعال هات لي بقى
عيل أنت عنده تلتاشر سنة تعور هو هيصوت
وأمه هتصوت وأبوه هيصوت والشارع
هيصوت على الأفة والواوا اللي حصلت له
وكلنا بقى نقعد نعيط ومحن وهنزل بوست
وأنا وأنا ابني في المستشفى وعاملة له بلاستر
وادعوا لابني ابني يتعور واوا ولو اتحطت
كانيولة بقى بيقى المفروض تجمعوا لي
تبرعات بيقول اتقطعت ايده ايده اتقطعت
تلتاشر سنة. بيقول لي اتعلقت في كتفي مش
بقى يعيط ويروح وعايز ماما وبتاع ما احنا
مربين فرافير احنا مربين فرافير يعني مش

مربي رجالة احنا بنربي فرافير مش هيشيلوا
هم واحد اخره لما بتاخدي منه موبایل بيعيط
لما يتاخذ من واحد موبایل ويعيط بيقى ده مش
راجل معنى ما ربناش رجالة بمعنى كده بيقى
فعلا ربي عيال هشة نربي عيال فعلا شبه
الشيبسي اللي بياكلوه. بنربي عيال ما يفرقوش
عن الشيبسي اللي بياكلوه اتقطعت دراعه
بالعكس قعدت اجر جر ها ويقا تل بايده الثانية
وعادي هو بيجربها عادي هو مش مش في
باله. عشان كده قلت لكم الهم بيشغلك. عشان
الهم لما يشغل واحد بينسى الحاجة الثانية زي
ما قلت لك كده لما انت جبتي ابنك وما
حستيش برجلك لما اتعورت نفس الفكرة هو
هو شاغله الجهاد قاعد يقاتل طول اليوم ومش
حاسس ان فيه ايه المقطوعة اصلا هو صاحبها

وخلص. ويضرب وبتاع دول حتى ارهقتني
حتى ايه ارهقتني متخيل بقى لما ارهقته عمل
ايه ها طلع من المعركة. قال لك خلاص بقى
كفاية كده. كتر خير الدنيا خدت اللقطة.
صورني يا ابني وانا ايديا مقطوعة. صورني
يا ابني وأنا وأنا بضرب بالسيف. سواء يا ابني
ادينى اللقطة بقى ادينى اللقطة بقى ادينى
اللقطة احنا بنطلع رحلة عشان نتصور احنا
بناكل في مطعم عشان نتصور احنا بنعمل
الخير عشان نتصور احنا بناكل القطة عشان
نتصور احنا بننقذ كلب عشان نتصور احنا
بندي الفقير صدقة عشان نتصور والله الواحد
ده لو كان فيه تصوير ايامه ده كان ايه ده
احلى ده احلى فيديو ده كان هيجيب ملايين
المشاهدات شاهد ادخل شاهد ايد معاذ بن

عمرو من الجموح وهي مقطوعة ادخل شاهد
قبل الحذف ادخل شاهد الفيديو الشهادة
بالملايين ادخل شاهد عمرو من الجموح بيقا تل
بايد واحدة والايدي الثانية مدللة وبتجيب دم
ادخل وشاهد المقطع الخطير يلا اعملي اللايك
الاجباري يا جماعة لايك وشير ومنش
وسبسكرايب قبل ما تشاهد المقطع يلا يلا جمع
لي بقى جمع لي، هو في أحلى من كده، ده
أنت لو واحد فينا حصلت له موقف زي ده ده
بيأكل قطعة بيعمل عليها فيلم أومال، لو أنا بقى
ايه لو أنا بقى ايه عملت واحدة زي ديت أنا
ماسك سيف بايد وبجر جر ايدي وهي مقطوعة
في غزوة بدر هقول لكل الجيش موبايلاتكم يا
جماعة انتم ما بتصورونيش ليه؟ انزل يا ابني
بالفيديو، انزل لي باللقطة يا ابني، تفكر عمل

ايه بقى لما ايده اتقطعت ومدللة؟ قال أنا بقى
إيه قعدت بقيت يومي بقاتل وهي مدللة كده
قال أرهقتني تفكر عملي؟ قال فارهقتني
وأعاقنتي عن القتال، قال بص أنا عايز تتخيل
معلش أنا أسف منظر بشع البنات هيعيطوا
دلوقتي قال فارهقتني، قال فوضعتها تحت
جسمي ماشي بس مدللة مقطوعة فجابهها كده
قال فوضعتها تحت جسمي وتمطيت وتمطيت
فقطعتها وألقيتها حتى استطيع أن أقاتل، قطع
ايده قطع ايده

علشان معطلاه عن القتال أنتِ مش قادرة
تمسحي التيك توك يا أستاذة، أنتِ مش قادرة
تمسحي الانيس تا يا أستاذ ها، أنتِ مش قادرة
تقطعي مع صاحبتك اللي مودياكِ في ستين
داهية ها أنتِ مش قادرة تقطعي عادة سيئة

بتعملها ، أنت مش قادر تمام بدري عشان
تصحى الفجر ، أنت مش قادر تحفظ نص
صفحة من القرآن كل يوم ، مش قادر تقطع
علاقتك بصاحبك السيء ، بقول لك قطع ايده
أنت مش قادر تعمل تمنع للتيك توك عيب
عليك أنت بتتكلم في ايه ؟ أنت جاي تعمل ايه
هنا ؟ أنت جاي تعمل ايه ؟ ها مش قادر تمسح
التيك توك ناس خايفة ، معلش خيابة ، هنعمل
ايه لما أنا أقعد أحرق أنا ثلاث لايفات وفي
الآخر أنت مامسحتيش التيك توك لغاية دلوقتي
بنتكلم في ايه همك ما أهمك لما اخد منك التيك
توك وتعيط يبقي ده هو ده أنت وأقول لك
التاني دوت ايده عطلته قطعها ، أنت التيك
نوك موديك في داهية ومش عارفة تقطعيه ،
موديك في داهية ومش عارفة تبطليه أنت

الميديا خاربة بيتك مش عارفة توقفيها، أقولكو
ايه طيب، هختم بقى بكام مثال من غير
تفصيل عشان أنا تعبت وأنتم بتفهموا لوحديكم
هقولكم عنوان وهتفهموا

ما الذي كان يبكي الرجال، ما الذي كان يبكي
الرجال أيام الرجال، مش بقول يبكي النساء،
لا ده لو ده اللي لو بيبكي الرجال أكيد بيبكي
النساء ما الذي كان يبكي الرجال أيام الرجال

واحد : عمير بن أبي وقاص أخو سعد بن أبي
وقاص، كان عمير في غزوة بدر عنده
أربعناشر سنة كان صغير لسه فكان لسه
جسمه مش مش قوي يعني قال فكان النبي
عليه الصلاة والسلام يجهز جيش بدر قال
فكنت اختبئ خلف سعد حتى لا يراني رسول
الله صلى الله عليه وسلم من الجهاد والقتال،

قال ولكنه رآني فلما رآني قال لي لا تذهب
معنا ظللت أبكي ظللت أبكي ظللت أبكي حتى
رحمني. وأجازني ورضي أن أذهب معهم في
يوم، تمام مش ببيكي عشان المشاهدات قلت
يا جماعة مش ببيكي عمير النبي وقاص عشان
بيعتوا له حوت مش ببيكي ويعيط مش هأكل
إلا لما تبعتموا لي حوت، مش ببيكي ويعيط
عشان المشاهدات قلت والمشاهدين مش
بيعتوا له دعم وفلوس على بات ها بيعيط
عشان مش رايح مش هموت ما أنا عايز
أروح معكم أنا عايز أروح أموت معكم تمام

وفعلا راح الغزوة ومات عمير النبي

ومات على يد من خد بالك؟

عمرو بن ود، عمرو ابن ود ده كان فارس
رهيب من فرسان قريش وهذا دليل أن لم يكن

في الخلف وإنما كان في الأمام، لأنه لا يمكن أن يقتله فارس ضخّم زي عمرو بن ود إلا إذا كان في مقدمة الصفوف، راجل ابن راجل راجل وأخو راجل أخو سعد، تمام مش ببيكي ها علشان عشان كل العيال معاها لانش بوكس وأنا معيش لانش بوكس، ها عمير مش مش راجع لماما بيعيط من المدرسة عشان معيش لانش بوكس أنا والعيال كلها معاها عشان العيال دي جايبين سندوتشات وأنا مخدتش وأبوه مش قادر يجيبلو اعملو ايه تمام، عشان العيال معاها كلها أيفونات وأنا معيش معايا موبايل عادي مع الماية العادي يا بابا طب ما جبتلش موبايل ليه لغاية دلوقتي انا كل أصحابي عندهم موبايل واعيط بقى ما هو ده الواقع يلا اللي بعده زيد بن ثابت. زيد بن

ثابت نفس الكلام بالظبط راح مع للنبي عليه
الصلاة والسلام يوم بدر قال له أنا عايز أروح
معك الايه؟ القتال النبي عليه الصلاة والسلام
شافه بقى ده كان أصغر من عمير بقى أصغر
منه فرفض تماما بقى المرة دي رفض تماما
تمام فرجع زيد بن ثابت لأمه يبكي، ها زيد يا
زيد تبكي ليه يا زيد تبكي ليه يا زيد عشان
معكش لانش بوكس تبكي لماما ليه ها عشان
ما عندكش بتاع الشحن خلص الباقية خلصت
تبكي لبابا عشان مشحنشلك الباقية يا حبيبي!
تبكي ليه؟ تبكي ليه؟ عشان برشلونة خسر!
تبكي ليه؟ عشان كريستيانو مخدش كاس
العالم! بتبكي ليه ها؟! عشان الأهلي خسر
الكاس! تبكي ليه يا زيد؟! عشان الكراش!
عشان البت الكراش بتاعتك مش معبراك!

بتبكي ليه يا زيد؟ ها بتبكي ليه؟ عشان البت
الكراش بتاعتك طلعت بتحب صاحبك! بتبكي
ليه يا زيد؟ ها بتبكي على إيه؟

عايزين بس نعرف؛ بتبكي عشان ضربة
الجزاء بتاعة فريق أحلامك مدخلتش! ولادنا
بيكوا ليه؟ بيكوا في المدرجات؟ بتبكي ليه يا
زيد؟ بتبكي عشان احنا في حفلة ليلة الدموع
اللي في السعودية؟! وعشان حماقي وحمادة
هلال وشيرين قالوا الأغاني اللي تقطع القلب!
أنت بتبكي ليه؟ عشان حسام طلق شيرين
زعلانة قوي أنت ها؟! زعلانة عليها أنت
صعبانة عليك صح! تبكي على إيه يا زيد؟

بيكي عشان مروحتش غزوة بدر، مروحتش
إيه؟ مروحتش فين يا حبيبي؟ مروحتش
الرحلة بتاعة المدرسة، لا لا يا ماما مروحتش

غزوة بدر، مرحتش فين يا زيد؟ ما
اختاروكش في الألعاب؟ منزلتش ملعبتش كرة
في الألعاب؟ لا يا ماما، ماما أنا مروحتش
غزوة بدر مروحتش أموت، تبكي ليه؟ عشان
مطلعتش الأول في الكرة؟ لا يا ماما عشان
مروحتش غزوة بدر.. بدر، إيه المشكلة في
غزوة بدر؟

ماما غزوة بدر... بدر رايحة أموت يا ماما،
رايح جهاد في سبيل الله، إنت إيه؟ في إيه؟

الأم تفاعلت جدا معايا لدرجة إن هيا راحت
بقى للنبي _ عليه الصلاة والسلام _ قالتله مش
ممكن أنت مخدمتش ابني ليه؟ قالها مش هينفع
ده صغير جدا، قالتله طب أقولك حاجة عشان

بس أنا سيباه منهار تمامما، قالتله ابني عنده
مهارة فظيعة استغله، قالها مهارته إيه؟

قالتله عنده حفظه رهيب، بيحفظ حفظ وذكي
ذكاء خارق، قالها طب هاتيه، تعال يا زيد
متزعلش يا زيد متعيطش يا زيد، متعيطش
أنت رجل، متعيطش أنا هجيب لك شغلانة
ثانية حلوة، خلاص متعيطش بقى، خلاص
مش هعيط، مالك استعملني أنا راجل، أنا
ممكن اعمل حاجات حلوة طيب أنت ذكي؟ اه.
تحفظ كويس؟ اه. طب عايزك تتعلملي لغة
اليهود عشان هم ببيعتولنا مراسلات وأنا
معرفش لغة اليهود اتعلمها لي وأنت هتبقى
المترجم بتاعنا بعد كده، حاضر، راح زيد بن
ثابت ١٧ يوم كان اتعلم لغة اليهود كاملة،
كان بيعرف يقرأ ويكتب ويترجم، ١٧ يوم

اتعلم اللغة السيريانية اللي هي من أصعب اللغات، بس اتفرج الوحش ده عمل إيه، زيد بن ثابت اللي بعد كده أبو بكر كلفه بجمع القرآن، مهمة جمع القرآن زيد بن ثابت قام بيها، لماذا بكى الرجال؟ لماذا كان يبكي الرجال؟

فهذا كان ما يبكي الرجال، تعالوا أقولكم أنس الراجل بقى الراجل، أرجل الراجل ده أنس بن مالك رضي الله عنه وأرضاه، أنس مرة كان بيبكي فالناس قالوله أنت مالك يا أنس بتبكي ليه كان كبير كان سنه كبير، مالك يا أنس بتبكي ليه؟ قال أبكي على يوم فتح تستر، إيه يوم فتح تستر ده؟

فتح تستر ده كان يوم مطحنة، كان أكبر حصن للفرس كان المسلمين وكان المسلمين عددهم

تقريباً ٣٠ ألف وكان الفرس عددهم ١٥٠ ألف وقعدوا محاصرين الحصن أسبوعين، أسبوعين محاصرين الحصن ما بيتفتش وأخيراً اتفتح وانتصر المسلمون وكسبوا المعركة، بس أنس ببيكي، مالك يا أنس؟ بتبكي ليه يا أنس؟ مالك يا أنس؟ ده يوم أعز الله فيه الإسلام، قالهم اه ما أنتم مش عارفين المشكلة، كان يقعد يقول مالي ولتستر...مالي ولتستر، أنا إيه اللي وداني؟ أنا إيه اللي وداني اليوم دوت؟ طب أنا كنت فحالي، مالك يا أنس! طب إيه المشكلة ده احنا انتصرنا وده كان يوم عظيم وفي ميزان حسناتك وكان فتح الفرس كله بسبب فتح تستر دوت! وهو يقول أنا إيه اللي وداني... أنا إيه اللي وداني! أنا مالي ولتستر!

ما إيه اللي حصل؟ قالهم أصل احنا المشكلة إن
اليوم ده لما اتفتح الحصن اتفتح قبل الفجر
بساعة، يعني دونا عن الأسبوعين كلهم اتفتح
الحصن قبل الفجر بساعة، طب إيه المشكلة؟
قعدنا نقاتل ومن الطحن اللي احنا شفناه ومن
المدعة اللي احنا كنا شفناها ومن الفرم اللي
كان في المعركة

دي نسينا كلنا نصلي الفجر، لدرجة إن خلصت
المعركة بنبص كده فلقينا الشمس طلعت، إيه؟
الشمس طلعت، بيقولوا قعدنا كلنا نبكي على
ضياع صلاة الفجر وكانت أول وآخر مرة في
حياتي تضيع مني صلاة الفجر، والله والله
وددت لو أنني اشتريت هذه الصلاة بالدنيا وما
فيها، مالي ولتستر... إيه اللي وداني؟ مالي
ولتستر؟ لا أنا مش عايز تستر أنا عايز صلاة

الفجر اللي راحت مني، ويقعد يبكي أنس
رضي الله عنه وأرضاه، آخر مرة صليت
الفجر إمتى أصلا؟ آخر مرة بكيت على صلاة
الفجر إمتى؟

هو ده اللي كان بيبكي الرجال مش ليلة الدموع
بتاعة جدة! ده اللي كان بيبكي الرجال مش إن
هو البت باعته وسابته ها! هو ده اللي كان
بيبكي الرجال، لو احنا رجالة هنبكي على
الطاعة، لو احنا رجالة هنبكي على السنة،
البنات بقى ده كرجالة ببيكوا المفروض البنات
أرق وأكثر تأثرا، آخر مرة بكيتي لما فاتتك
طاعة إمتى؟ آخر مرة بكيتي تساهلتي في
معصية إمتى؟ هو ده اللي بيبكي الرجال، فين
الرجالة؟ في زمن التفاهة في زمن الموبايلات
في زمن الميديا في زمن التيك توك في زمن

الانستا في زمن يعني ابعت لي حوت عشان
مش هاكل لما تبعتموا لي حوت وهقعد اعيط في
اللايف طول اللايف هعيط لغاية متبعتمولي
حوت، ما هو ولادنا هيبكوا على إيه غير على
الدنيا؟! هيبكوا على إيه غير على الكرة؟!
هيبكوا على إيه غير على اللانش بوكس؟!
هيبكوا على إيه غير على الماتشات؟! هيبكوا
على إيه غير على الموبايل اتاخذ منه؟! هيبكي
على إيه غيره إن هو مخدش بطولة في
المدرسة؟!!

■ **ما الهم الذي تحمله؟** ما الهم الذي تحمله؟

ما الهم الذي تحمله؟

همك ما أهمك هو اللي بييجي في بالك، ربعة
بن كعب الأسلمي لما كان يخدم النبي _ عليه
الصلاة والسلام _ قال له يا ربعة سلني ما

شئت، قال له اسألك مرافقتك في الجنة، سؤال
بديهي، إجابة بديهية تدل على حضور الشأن
في القلب، دايمًا العفوية هي التي بتدل ما
أهمك؛ لو أنا قاتلك دلوقتي نفسك في إيه؟

هتقولي حاجات كتير ويمكن ما تاخدش بالك
من إجابة ربعة ابن كعب الأسلمي.

أنا مش هطول عليكم أكثر من كده كفاية، لكن
أسأل الله _سبحانه وتعالى_ أن يهدينا وأن
يستعملنا وإن احنا نراجع همومنا ونراجع ما
يشغلنا ونحافظ على نفسنا وعلى ولادنا؛ لأن
احنا بنتسحب وبنتاخد وبنتجرف واحنا مش
واخدين بالنا إن التخليط اللي قلت لكم عليه في
أول الدرس بيزيد بيزيد لدرجة إن احنا
فعلا مبقيناش بنحمل هم الدين فعلا وبقت

همومنا عادية زي الناس احنا شكلنا ملتزمين
بس من جوة أقل من الناس، همومنا هي
همومهم أحلامنا هي أحلامهم، كان زمان يقول
لك للناس شأن وللمؤمن، شأن كان زمان
للناس شأن وللمهتدي شأن، لما يكون المهتدي
والمؤمن بقى زي الناس نفكر زيهم، نتكلم
زيهم، بنحلم زيهم، كل حاجة زيهم، إيه
الجديد؟! نراجع تاني ونجدد العهد مع الله
ونجدد الهم، ونخالط أصحاب الهموم عشان
الطبع سراق، ونبعد عن أصحاب الهموم
الرديئة عشان الطبع سراق، ونقرا لو ملقتش
الناس ديت فالناس دي موجودة في سير
الصحابة وسير التابعين وسيرة النبي _عليه
الصلاة والسلام_، موجودين في الكتب
موجودين في السير لو ملقيناهم مش على

الأرض نصاحبهم في الكتب وفي الدروس
وفي السير، لو ملقيناهمش على الأرض
نلاقهم في الدورات وفي الحلقات وفي
الحلقات العلمية، همك ما أهمك دايمًا اجبر
عقلك ينشغل بالقضايا الهامة وابتعد نفسك عن
القضايا التافهة لأن نفسك إن لم تشغلها بالحق
شغلتك بالباطل، وفي الآخر عقلك ده زي
الكباية الفاضية أول حاجة هتتصب فيه هتملاه
واللي بعده مش هيلقي مكان، لو أنت شحنت
تفاهات مش هيبقى فيه مكان للمهمات، ولو
أنت شحنت مهمات مش هيبقى فيه مكان
للتفاهات، وعقلك لما سبق ولما غلب عليه، ف
هذه نصيحتي اللهم بلغت اللهم فاشهد.

**سبحانك اللهم ربنا وبحمدك أشهد أن لا إله إلا
الله وحدك لا شريك لك استغفرك وأتوب إليك**

السلام عليكم ورحمة الله اتيك عليكم برضو
صح، متزعلوش مني بقى فالثلاثية دي بقت
مهمة خلاص، الثلاثية دي لازم تتعمل درس
لوحده خلاص بقت دي الثلاثية دي الحاجات
اللي تفوقنا بقى

👉 "لا ابرح حتى أبلغ" 👉 "عصر التفاهة"
👉 "ما الهم الذي تحمله؟"

الثلاث دروس دول لازم يحفظ زي أسامينا
وكل ما تريحوا اسمعوهم، وكل ما تحس إن
أنت سرحت اسمع الثلاثية ديت؛ عصر
التفاهة، لا أبرح حتى أبلغ، ما الهم الذي
تحمله؟

ثلاث دروس مؤلمة موجهة تعمدت إن أنا
أديهم ليكم علشان اطلع من الخطاب الدعوي

الخفيف اللي هو مبقاش مناسب لناس كتير بل
كان سبب في إن ناس كتير تريخ تفتكر نفسها
كويسة، في ناس كانت محتاجة الضرب دوت
أنا آسف يعني، كانت محتاجة الشدة دي شوية
علشان في ناس مينفعش معاهم غير كده،
الناس اللي احنا بنرجوا فيهم إن هم فعلا
يكونوا هم دول الأوتاد اللي هتقوم عليهم
الدعوة زي الصحابة، الصحابة حصل عليهم
شدة جامدة، ليه؟ هم دول اللي هيحملوا هم
الدين، أنا ممكن أرضى بأقل من كده بكتير
لواحد أقصى أحلامي إن هو ينجو من النار،
لكن لما أقول على ناس اللي بيتابعوني واللي
أنا عارفهم واللي هم رجالي في الدورات
والبنات اللي في الدورات أنا برجو منكم حاجة
أكبر من كده بكتير؛ فأنا مش هرضى إن أنا

اطببطب عليكم ومش هرضى إن أنتم تسمعوا
خطاب يضيع همّتكم وطاقتكم، أنا عايز اطلع
أجمل ما فيكم، أقوى ما فيكم، أحسن ما فيكم
عشان أنا بقول للناس اللي إن شاء الله أرجو
من الله أن يكون الناس اللي بتسمعي بالذات
وبتسمع غيري من الدعاه دول الناس اللي احنا
يوم ما نموت هنسيب ورانا رجالة، هنسيب
ورانا ناس تحمل هم الدين تحمل هم الدعوة،
ويدعوا لنا يقول الله یرحمك یا شیخ علاء
مضحكتش علينا، الله یرحمك حظيتني على
الطريق ویا رب يكون اللي بنعمله في ميزان
حسناتك، فلانم أكون صريح معاكم والرائد لا
يكذب أهله.

ربنا یدارک فیکم یا رب ویرضی عنکم
ویرحمکم، ویجمعنا وایاکم على الخیر دائماً

ويرزقنا العلم النافع والعمل الصالح والهمة
العالية ونحمل هم الدين بجد وميكنش أقصى
أحلامنا النجاة من النار بس لا احنا عايزين إذا
سألتم الله الفردوس الأعلى، احنا ولادنا
معتمدين علينا الدمار اللي شايفينه حوالينا
مستئينا مينفعش نبقى نص نص خالص خالص
خالص.

لازم نبقى جامدين انشفوا وأنا معاكم واحنا
بنفكر بعض وأنا على فكرة في الآخر أنا مفكر
نفسي يعني ما تفتكروش إن أنا بكلمكم برج
عالي مثلا أو إن أنا الجامد وأنتم التعبانيين أبدا
لا والله أبدا والله أبدا ما أشعر بذلك؛ أنا بشعر
إن أنتم كلكم أحسن مني فعلا كلكم أحسن مني
وأنا أقل واحد فيكم بس أنا دايمًا لما بحب ألوم
نفسي في حاجة بعمل عليها لايف عشان ألوم

نفسى واجلد نفسى فعلا عشان افوق أنا كمان،
فيارب نكون كلنا فوقنا كده وجزاكم الله خيرا.

أشوفكم على خير إن شاء الله، سلام عليكم
ورحمة الله